

**Siunnersuut Inatsisartut aalajagiiffigisassaat Naalakkersuisut imatut peqquneqarnissaannik, kingusinnerpaamik UPA/2021-mi, Naalakkersuisut saqqummiissasut ilinniartitsisunut supervisor-imik oqaloqateqartatsisisinnaalernissat meeqqallu atuarfiani sulisunut allanut aningaasaqarnikkut allaffissornikkullu qanoq sunniitigissanersoq. Oqaloqateqartalernissamut periarfissaq aaqqissuunneqassaaq imak, oqaloqateqarnermi sakkortuumik pisoqarsimatillugu imal. misigisoqarsimatillugu tarnikkut ikiueqqaarnissamut periarfissaasinnaasoq, immaqaluunniit piffissap sivilisunerusup iluani tarnip pissusaanik ilisimasalimmut oqaloqateqartarnissat, imal. katsorsaasoq alla aqqutigalugu oqaloqateqartarnissaq. Taamatut periarfissiineq aamma imaqassaaq sulisut namminneq oqaloqatigiinnittariaatsinik ilikkagarsinnaaffigissagaat, coach-itut siunnersuisinnaalernissaat, allallu.**

(Inatsisartunut ilaasortaq Tillie Martinussen, Suleqatigiissitsisut)

### **Akissuteqaat**

(Ilinniartitaanermut, Kultureqarnermut, Ilageeqarnermut Naalakkersuisoq)

### **Siullermeerneqarnera**

Naalakkersuisut Inatsisartuni ilaasortaq, Tillie Martinussen, Suleqatigiissitsisuneersoq, aalajangiiffissatut siunnersuutaanut qutsavigaat.

Naalakkersuisut siunnersuuteqartoq isumaqatigaat, oqarmat tarnikkut timikkullu atugarissaarnerit assigiimmik pingaartinneqassasut.

Misissuinermi ineriartortitsinermilu "Ilinniartitaanerup aaqqissuussaanaera eqaatsoq ataqatigiittorlu"-mi, Naalakkersuisunit akuerineqareertumi, inassuteqaatit ilagaat, meeqqat atuarfiat pitsaanerulersinniarlugu suliniutinik ineriartortitsisoqassasoq. Meeqqat atuarfiat pillugu inatsisip nutarterneqarnissaani tulliuuttumi ilinniartitaaneq eqaatsoq ataqatigiittorlu pillugit inassuteqaatit aallaaviussapput.

Meeqqat atuarfiata pitsaanerulersinnissaanut inassuteqaatit ilagaat, ilinniakkatigut qaffassaarnerit tamanit peqataaffigineqartussat pilersinneqassasut. Tassani ilinniartitsisut ilinniakkamik nukittunerulernissaata eqqumaffigineqarnissaa ilaavoq. Tamannali kisimiitillugu naammanngilaq. Meeqqat atuarfiata pitsanngortinnissaanut aamma ilavoq, ilinniartitsisut, ulluinnarni atuartitsinermi inuttut atukkamik unammillernartoqartitsisartut, supervisionertitalernissaannik periarfissiinissaq.

Atuartitsinerup meeqqallu atuarfiata pitsaanerulersinnissaa eqqarsaatigalugit meeqqat atuarfianni ilinniartitsisut ikorfartorneqarnissamik pisariaqartitsinerat qanoq annertutiginersoq meeqqat atuarfiat pillugu inatsisip nutarternissaanut atatillugu misissorneqassaaq.

Meeqqat atuarfiini suliffeqarnikkut atukkat annertuumik pingaaruteqarput – timikkut tarnikkullu suliffimmi atukkat eqqarsaatigalugit. Taamaattumik kommunit ataasiakkaat, atuarfiit atuarfiillu pisortaasa sulisitsisutut suliffinni atukkat pillugit inatsisinik naammassinnittarnissaat pingaaruteqarluinnarpoq, ilaatigut suliffinni misissuisarnernik inatsisitigut piumasaqaataasunik ingerlatsisarnermikkut. Tamanna meeqqat atuarfiannut taamaallaat atuutinngilaq, nunatsinnili suliffeqarfinnut tamanut atuuppoq. Taamaattorli suliffinni atugassarititaasut pillugit suliat Kalaallit Nunaannit suli tiguneqanngillat. Naalakkersuisut qallunaat oqartussaasui kajumissaarpaat nunatsinni paasissutissiiniarnernik annertuumik aallartitseqqullugit, tassuunakkut suliffinni tarnikkut atukkat annertunerusumik sammineqalernissaat qulakkeerneqassammat, suliffinni innarluuteqalertarnernik annertuunik, soorlu sivilunerusumik stressernermik, pitsaanerusumik pitsaaliuisinnaalernissarput angujumallugu.

Meeqqat atuarfianni ilinniartitsisut supervisionertittalernissaat allatigullu ikorfartorneqartarnissaat meeqqat atuarfiat pillugu inatsisip nutarterneqarnissaani tulluuttumi ilaatinneqareemata Naalakkersuisut siunnersuutip itigartinneqarnissaa inassutigaa.